

# Ohmächtigi Brieder

2005

## Acht Valentin im Waggisgwand

All Johr sin s Täfi und Mimose,  
Wo mir Eich gänn am Stroosserand.  
Doch hyt vertaile mir au Rose,  
Mir Valentin im Waggisgwand.  
Die schregglic Fluets zur Wiehnachtszyt  
Die lähmt ys und sy losst ys dängge:  
Statt Röppli, Taadel oder Stryt  
Wänn mir vyyl lieber Liebi schängge.

*Mängs macht e Misch, vyyl isch in d Hose,  
Kai Angscht, statt Röppli git s hyt Rose.*

E Rose fir s Tamara-Tussie  
Mit lange Hoor und änger Bluuse,  
Du schrybsch e Buech, Dir fällt nur Stuss yy,  
Dr Inhalt hohl und d Sprooch zem Gruuse.  
Du kasch kuum lääse, jetzt willsch schryybe.  
S git numme ains, won yych empfihl:  
Loss s Schryybe blyybe, zrugg an d Schyybe.  
Dy Rose het - wie s Buech - kai Stil.

*Ai Rose wär an Zubi gange,  
Doch sälle ka sy jo nid fange.*

E Rose, megligscht ohni Dorne,  
Die schigge mir an Aescheplatz.  
Denn mit z vyyl Dorne fliesst sunscht morne  
No vyyl meh Bluet root us dr BaZ.  
Wie Regierigsreet so liebe, lääbe,  
Do läset s, sait dr Bachmaa Yvo,  
Mir Lääser finde das drnääbe  
Und halte nyt vom Flachmaa-Niveau.

*E Reesli treschtet d Schneidere,  
Denn s Zollfrey-Zygs vrheitere.*

Mir wänn dr Tutanch-Amon-Pappe  
Mit Blome statt mit Blueme loobe.  
Är bringt is Schlange, Frangge, Rappe  
Und, will är nach Bonn goht, kaini Schwoobe.  
Doch wenn Du d Mumie, d Goldstigg, d Leie  
Denn s neggscht Mool paggsch, muesch ums Verworge  
Ai Mumie meh in d Kische gheye  
Und so dr Tschudi ganz entsorge.

*E Rose griege d Bahnhof-Bosse,  
Denn derte wird sy sicher gosse.*

E roti Rose goht nach Bärn,  
Grad wenn mir d Trämmli retour bringe.  
Frau Fetz, denn spirsch, mir hänn Dy gärn,  
Au wenn Du nimm so lut darfsch singe.  
Bevor e Vogel sydwärts flatteret,  
Beringsch ihn fyyn, drmit är singt.  
Dass d Fetz nur lyyslig schnatteret,  
Isch klar, sy het sich z digg bering(t).

*Dr Hirschhorn wisst e Blueme z nytze:  
Er kennt sy statt em Blocher spritze.*

Zwai roti Rose, wie z erwarte,  
Git s fir die miede Köbi-Kicker.  
E roti Rose pro roti Karte.  
Me Gool und Pinggt, das wär vyyl schygger.  
“Ain het sich vor em Seggle druggt”,  
Das sait dr Köbi, s syg e Drama,  
“Dr zwait haig numme ummegspuggt,  
Y ha statt Stirmer numme Lama.”

*Zu synre Blueme sait dr Haki  
S neggscht Aagebot, y glaub, das pagg y.*

Nur s Baselbiet, das lehn mir warte,  
Däm zaige miir dr kalti Rugge,  
Statt roti Rose, roti Karte.  
Die wänn sich vor em Zahle drugge.  
S Spittel, d Bolizei sin z trenne  
Dr Sinfonietta goht s an Kraage,  
Drumm griegt dr Rampass d Rose denne,  
Wenn är s uns zahlt het, s Strau am Waage.

*Die scheenschi Rose Diir in d Händ.  
Denn wär liist Zeedel bis zem Änd?*

---

D Ladäärne-Uusstellig uff em Minschterplatz und  
d Waage- und Reggwisyte-Uusstellig bi dr Kasäärne  
sin vom Määntig znacht bis am Mittwoch demoorge  
Deert ka men au alli Zeedel und Schnitzelbängg,  
d Blaggedde und dr Rädäbäng kaufe.